



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :



Tir Yimym



tir_yimym



tir yimym

TAPAK 8

District ajak nung Mini Secretariats
amenoktsü: Delhi CM Rekha Gupta

Neeraj-i anir India nunger asayartem
Wrold Championship asayatsü



VOL. XXII ISSUE NO. 318 (ADOK 318)

DIMAPUR

TENTONÜ MONDAY)

RONGJUI (SEPTEMBER) 01, 2025

₹ 5.00

Hornbill TV osangbener yirutsüba bushisüngdangtsü akhanger

Dimapur, Luroi/August 31 (TYO): Manipur nung Senapati district kübok Laii yimtsüng nung August 30, 2025 nü Hornbill TV indang osangbener Dip Saikia dak airgun injang agi yirutsüba atema bilemstsür, ta Dimapur Press Club (DPC) sangdong ka ajanga ashi. Pa tekeraba nung taneptsü angutsü sarasademstsür, ta ashi. Mezüngbo asaa akhaba ama osang liasü saka iba sülen tesem balala nungi jangshitsüba nung ibai asaa inyakba masü ta sayur. Ajsüüaka iba tatalokba tensa ya tebilemstsü lir.

Naga nunger yimtsüng ajunga nung dangar temi shikaridang amshiba nok-nü nokdangba customary ozüing yur komasür iba yimtsüng nung bendanger kati prangbong ka bener liasü, ta tasüngdangba lir.

Raraba tesem nunga süang mesüra sobaliba sentong nunga süang, osangbener ka takum mapang ajak nung kumzüka ayutsüla, ta DPC ajanga ashi. Kechi yimya nung südir süaka, osangbener nem timtem agütsüba ya press freedom anema lir. Anungji Laii Village Council, Senapati District administration aser ozüing amshirtem dang iba tatalokba indang tejangja osang lemsateptsü aser tapet mera agitsü ayongzüker, ta ashi.

Kasa mapang DPC ajanga

media nung külemi inyaker aser nüburtem dang tatalokba mejangja tashi politicize masütsü ayongzüker, ta sangdong ajangasa ashi.

Manipur nung Senapati district kübok Laii yimtsüng nung Zinnia Flower Festival indang osang bendenba sülen meyipa shilangba mapang Nagaland nung aliba Hornbill TV osangbener ka August 30, 2025 nü yirutsüba asoshi tebilemstsü akar, ta Kohima Press Club-ia sangdong ka nung ashi.

Külem osangbener ka yirutsüba tia maka atalokba aitsür aser timtem ajuru alisang osangbener tekeraba nung taneptsü angutsü asoshi sarasademstsür, ta ashi.

Osangtem ajanga ashiba ama ibai 'accidental' ka asütsü akok, saka ketdangsür dang kanga junga bushisüngdanga nübur ajunga kumzüka ayutsü ajungshir, ta KPC sangdong ajangasa ashi.

Maneni Nagaland Pradesh Congress Committee-ia sangdong ka nung Hornbill TV reporter yirutsüba atema khukhua aitsür ta ashi.

Tebilemba tamajung jangjatetsü aser media nung inyaker tem kumzüka ayutsü asoshi Manipur aser Nagaland sorkar dang iba tatalokba tekeraba nung aser ochi nung bushisüngdangtsü ajungshir, ta NPCC-i ashi.

High Court totuyuba nung onoki inyak: H&FW Dept.

Dimapur, Luroi/August 31 (TYO): Nagaland Medical Students' Association (NMSA) ajanga longkak ait tenzüka sülen state Health and Family Welfare department ajanga COVID-19 mapang Medical Officers 98 shima aliba regularize sütsütsü sangdongba nung par jenjang jangshitsüogo.

Department-i Deobarnü sangdong ka ajanga ashiba agi, Gauhati High Court, Kohima Bench ajanga August 1, 2025 nü totuyuba ka agütsüba ama parnok regularize sütsütsü telemtetba agi.

NMSA ajanga writ petitions benokba court-i magizük, kong COVID-19 pandemic mapang inyakba medical officers tem atema state sorkari special recruitment drive agiba anema ken o agüja liasü, ta ashi.

Petitioner temi policy decision

anema nokdaksü "locus standi" mali, kechiaser parnok ya jashia alirtem masü aser Constitution indang Article 226 kübok 'grounds for interference' magütsütet, ta court ajanga ashi. Anungji iba obendang ajanga November 21, 2024 nung khen asoshi totuyuba agüja aliba yutsür.

Court totuyuba ama departmental screening committee ajanga Medical Officers 98 asoshi "one-time dispensation" ama regularization maparen tenzü, ta Health department-i ashi. Aser iba ya August 18, 2025 sangdong ajanga jangjatsür.

Petitioner temi High Court nung appeal agüja lir asünungji, ken o sub judice nung lir. Anungji kecha yimya nunga longkak aittsü memelar, ta department ajangasa ashi.

Dimapur aser Niuland atema District Level Youth Fest ayongzüksü

Kohima, Luroi/August 31 (TYO): District Youth Resources Office, Dimapur ajanga Dimapur aser Niuland atema District Level Youth Festival ayongzüksü, kong sobaliba ken aser tsüingsang aser o jembiba nung tetoktepba alitsü.

Iba dak sendakba nung jangra aliba kija, clubs, cultural troupes, Higher Secondary Schools aser

Colleges tem shilem agitsü jaoker aser DYR Office Dimapur nem September 9 tashinung letter of interest agütsütsü ayongzükogo.

Iba sentong asoshi osangtsüasang tali tejangjaba nung metettsü asoshi mobile number 9089206973 nung jembitsü akok, ta N.Vineikholie, District Youth Resources Officer, Dimapur sangdong ka nung ashi.

Nagaland Tribal Apex HOHOs temi NFHRCC nem maneni tashi agütsür



August 29, 2025 nü Nagaland Tribal Apex HOHOs aser Dimapur nung aliba Tribal HOHOs tem den shisadokden senden aliba mapang tangokba noksa angur.

Dimapur, Luroi/August 31 (TYO): NFHRCC Base Office, Kher Mahal, Dimapur nung August 29, 2025 nü Nagaland Tribal Apex HOHOs aser Dimapur nung aliba Tribal HOHOs tem den shisadokden senden ka mena liasü.

Iba senden nung NFHRCC, HOHOs aser Trans Nagaland Highways (Foothills Road) indang tatsü-talang ajak jembia liasü.

Iba senden nung Committee aser Trans Nagaland Highway (Foothills Road) indang meshidak

angatetba ajunga benteta liasü, kechiaser Trans Nagaland Highway aser Foothills Road ya kasa dang lir ta angatettep.

Maneni Apex Nagaland Tribal HOHOs temi iba Project merenem tashi NFHRCC alitsü nenshia tashi agütsü aser nungloksü.

Foothills Road (Trans Nagaland Highway) dak sendakba nung ali kibur aser ali kibur masüba tsüngta tepila kecha mali, kechiaser lenmang ya Naga nunger ajunga meyong lir.

Anungji iba People's Road ajanga Naga nunger kibong nung telemsa adokdaksür yimsü asütsü tasa ketdangsür shinga nema memelatsü, ta iba senden nung pangjem.

Trans Nagaland Highway (Foothills Road) taliba nung ochishia inyakdaksütsü atema watchdog ka ama asütsü asoshi NFHRCC ya empanel asütsü ajungshia MoRTH (Ministry of Road Transport and Highways), New Delhi dangi shiti ka zülutsü lemteba liasü.

MoRTH nung NFHRCC empanelled asütsü akhanger

Dimapur, Luroi/August 31 (TYO): Nagaland sorkari taoba mapang Foothills Road ya 1974 aser 1993 nung yanglutsü merang saka tia maka mapa küma meinyaktet. Iba sülen yangi shia aliba Apex Tribal Hohos temi 2013 küm Foothills Road Co-ordination Committee (NFHRCC) tenteta Foothills Road Construction inyakyim ketdangsütsü asoshi Committee nem tashi nungloksü aser iba yongji Foothills Road Project dang Extra-ordinary mesüra People's Project ta ajar, ta Ao Senden, Chang Khulei Setshang, Konyak Union, KUKI INPI Nagaland, Khamniungan Tribal Council, Lotha HOHO, Phom Peoples' Council, Rengma HOHO,

Sumi HOHO, Tikhir Tribal Council, United Sangtam Likhum Pumji, Yimkhuing Tribal Council aser Nagaland Zeliang Peoples' Organisation lungjemer Secretary, Ministry of Road Transport and Highways (MoRTH) dangi shiti ka August 29, 2025 nü zülua liasü.

Nungloksüba ama Committee ajanga ali kiburtem dang senjang kata magie pei ali agütsütsü jembia aser NNPGs (Naga National Political Group) temia Foothills Road Construction dak sendakba nung tax kecha memeshitsü angatettepa liasü. Iba sülen Committee yagi tim department den teka amteper tesüiba küm 13 tashi iba project achayanga aser reprangshima arur, ta ashi.

Indian Constitution indang Article 371 (A) kübok Nagaland state asoshi special provision agüja aliba nai meteta lir, koba ajanga loktiliba aser sobaliba, tamangba yimsü, customary laws aser ali kibur asüba temeden balaka agüja lir, aser iba yongji Committee ya empanelled asüba sülen onoki ner ketdangsüba tashi nem RoW (Right of Way) agütsütsü.

Anungji item tatalokba aser kulitem nung ajemdaker iba project mapang telatet nung tajungtiba aser ochishia renemdaksütsü asoshi project achayangtsü asoshi Commi8ttee ya empanelled asütsü ajungshir, ta kin 13 sangeri züluba shiti ajanga ashi.

NMSA-i tanüa maneni longkak aittsü

Dimapur, Luroi/August 31 (TYO): Department of Health and Family Welfare nung COVID-19 mapang contract nung shimer regular kumdaksütsü asoshi state sorkari telemtetba agiba anema maneni September 1 nüa longkak aittsü, ta Nagaland Medical Students' Association (NMSA) ajanga sangdongogo.

Contract nung shimba nisung 280 regularize asütsü atema Health department ajanga August 18 nü sangdong ka agütsüba anema onok akang-akanga nokdaksü, ta NMSA-i Deobarnü sangdong agütsüba nung ashi.

Secretariat Bus Stand, Kohima

nung anepdang 9:30 ako nung 'peaceful procession' ka tenzüksü aser Health and Family Welfare department tsütsüi aotsü aser yangji longkak aittsü, ta ashi.

Parnoki kaketsür tentet, civil society organizations aser nüburtem dang iba sentong nung adentsü aser longkak aitiba mapang o jembitsü asoshi nisung shimer yoktsü ayongzüka liasü.

NMSA yagi August 18 sandong ya tangsa agientsü aser sanctioned posts ajunga Nagaland Public Service Commission (NPSC) aser Nagaland Staff Selection Board (NSSB) dangi yoka service rules nung aliba ama

open advertisement, written examination aser viva voice ajanga shimtsü akhanger.

Kasa mapang Combined Technical Association of Nagaland (CTAN) puria iba longkak aitiba nung bhusemer ta metetdaksüogo aser sorkar telemtetba ya constitution alema inyakba aser tapi agi pei ajung asaa inyakba lir ta ashir.

CTAN sangdong ka nung iba mera yagi tetemsü nübu shimba yimya aser 'established recruitment norms' nung aibelener ta ashi aser federating units ajunga dang NMSA den külemi longkak aitiba nung shilem agitsü ayongzükogo.

27 Mkg Town A/C NDPP pur 2024-27 kümsük asoshi ketdangpur shimmokba sentong agi



Ketdangpur tasen shimertem tenangzükba agiba mapang tangokba noksa angur.

Mokokchung, Aug. 31 : 27 Mokokchung Town Assembly Constituency Nationalist Democratic Progressive Party (NDPP) telok pur A/C aser Unit-tem nung ketdangpur shimmokba sentong ka 29th August, 2025 nü Multi-Purpose Indoor Stadium, Imkongmeren Sports Complex, Mokokchung nung meraketa agiogo.

Ketdangpur tasen shimertem tenangzükba agiba maparen NDPP Mokokchung Region President, Repameren-i ketdang süa agitsü. Iba sentong nung Mokokchung Town A/C kübok telen ajak nung ketdangpur 397 shima tenangzükba agiogo. 27 Mkg Town A/C kübok unit pungu lir, itemji – Kumlong, Mongsenbai, Kichutip, Salangtem and Aongza ward.

Iba sentong nung Rural Development & SIRD, Minister, Metsubo Jamir-i jembidang, NDPP party ya tenzüker talangkabo masü saka Tsüngremi iba party kanga moaja arutar, ta ashi. Aji oda, tasen shimer ajak nem tenüngsang agütsü aser tejenpuri kanga meranga inyaksüba asoshia pelaba lemsatep. Aji oda, paisa party ketdangsürtem dang party nükjidong angateta nüburtem dang rangloker tenzüksü ajungshia liasü.

Ketdangpur 397 ji atamata masü, anungji, lungjemer inyakra iba yagi party tejakleni anitsü, saka ano iba yagi timtem agütsü meso nungbo tulu metizüktsü, ta pai ashi. Paisa Mokokchung Town Assembly Constituency sangertemi pa nem NDPP ticket nungi tanaben maongka agüja shimba den tanü tashi amalitepa aruba asoshia pelaba metetdaksü.

Joko election atongtsü küm 2 sür tesadang dang lir, anungji, asenok lungjemer Mokokchung district nung koba constituency nungsa party puri takok ngua ali, item ajak nungji taruba election nungjia takok angutsü merangtsü. Tanü shimer telok yagi taruba election-ji ajurutsü, anungji, tali akangshiba den meranga inyaksü asoshi paisa ajungshi. Party pur mejanga meli-i kibok sema shirnoksa asenok den maden, parnokji anitentsü merangtsüla, ta paisa ayongzük.

Tawa NDPP 27 Mokokchung Town Assembly Constituency, Youth Organization-i medical camp ayongba to kanga takok nguogo, anungji, laurtem dang pelaba den tarutsü nung iba dang tuluba ayongtsü nükla yudi, ta pai ashi. “Iba medical camp ajanga koda masür aser timtemer aika

tajangzük anguba angashia pelar, iba ya vote aginüba agi masü saka temeim mapa inyakba lir”, ta paisa shisem.

Metsubo Jamirisa “empowering our youth with one vision for a global future” ta sür lanurtem atema inyakba mapatong ka tenzüksü. Iba mapatong ajanga lanur 100 hotel management tsütsü training agitsü aser parnokji Japan, Dubai aser tanga tesem nung mapa inyaksü maongka angutsü. Iba ya Honda India CSR den külem sür minister Metsübo Jamir-i par constituency lanurtem atema achayangba mapa ka lir.

Iba sülen ano Metsüboisa 27 Mokokchung Town A/C Youth Organization-i ayongba 5 buba Football Tournament-cum-Penalty Shootout sentong Multipurpose Hall, Imkongmeren Sports Complex nungsa tenzüksü.

Ketdangpur shimba sentong nung NDPP CEB nung vice president – Marchizüing, NDPP 27 A/C president – C. Tia Longkumer, 27 A/C women organization president – Meyila Jamir, Kichutip unit president – Imtioshi, 27 A/C youth organization general secretary – Tamsuwati aser 27 A/C women organization treasurer - R. Amongla parnok shilem balala agi.

Sirhima nung Financial Inclusion saturation campaign agiogo

Dimapur, Luroi/August 31 (TYO): Financial Inclusion scheme tem atema ita asem asoshi ayongzükba aliba saturation campaign nung shilem ka ama Financial Inclusion and Development Department (FIDD), Kohima-i ayongzükba August 30 nü Medziphema block kübok Sirhima yimtsüng nung Financial Inclusion saturation campaign ka agiogo.

Sentong nung o tatsüka jembiba mapang Chief General Manager, FIDDD, RBI CO, R. Giridharan-i, Benjamin Franklin-i, "A Penny Saved is a Penny Earned," ta ashia olen lephsia jembiba aser sen rizünga ayutsüji aazüktsüba den kasa dang tongtibang lir, kechiyong iba yagi nü rongsen taliba kümdaktsür, ta ashi. Paisa, banking ya taküm nung koda tongtibang iba indang lemsatep. Maneni pai sentepa aliba lokti dang iba saturation camp ya koda tongtibang aser iba ajanga nüburtem koda ajangzüktsü iba indang lemsatepba den re-KYC koda

tongtibang aser bank temi maongka agütsüba aser iba amala camp ajanga tajangzük anguba indang lemsatepba liasü.

Kasa mapang nung Deputy General Manager (C&A), BoB Zonal Office, Guwahati, Biswajit Swain-i financial inclusion indang jembiba liasü. Surabhi Bhattacharyya, Deputy General Manager (B&O) SBI Administrative Office, Jorhat-ia PMSBY, PMJBY aser APY amala social security scheme tem meteta alitsü koda tongtibang aser basic banking facilities nükjidong aser iba amala scheme tem ajanga tajangzük agütsübatem meteta alitsü nüngdakba lemsatepba liasü.

Sentong nungsa ADC Medziphema, P James Swu, NCS-i, KYC koda tongtibang iba indang metetdaksü. Paisa nüburtem dang camp ajanga maongka agütsüba ajak agitsü aser ken o mejangjabatem jangjashia banking facility tem jangja ayutsü ajungshi.

Maneni General Manager

(O-i-C), RBI Kohima Sibonkhini-i, financial security scheme aser financial & digital Literacy indang aser PMJBY, PMSBY, APY amala scheme tem nung züngoksemtü aser tajangzük koda agitsü iba indang tangazükba agütsü. Paisa, digital fraud prevention indang tangazükba agüja liasü.

Sentong nung Lead District Manager, Chumukedima Nenei Hansing-i lokti pela agizükba o jembiba aser AGM RBI, Kohima Mangta Snouts-i tepela anküp o jembiba liasü.

Campaign koba July 1 nü tenzük aser September 30 nü tembangtsü lir, iba ya sorkar scheme balala indang metetdaksütsü aser financial inclusion aser tesem balala terenlok ajungkettsü nükjidong nung tenzükogo. Sirhima yimtsüng nung saturation campaign ayongzükba agiba mapang yimdaklir 300 nem rongsenketzüng dak sendakba nung tongtibang onüktem dak ajemdaker tangazükba agütsüogo.

Wokha DC-i taruba somomo benjung atema senden ayong

Dimapur, Luroi/August 31 (TYO):

Deputy Commissioner Wokha, Vineet Kumar IAS-i, taruba somomo benjung atema sensaksem akatsü asoshi September 1 nü 12 ako nungi tenzükba Wokha DC conference hall nung senden ka amentsü ta metetdaksüogo.

Senden ya taruba somomo benjung atema renemshia alitsü asoshi ayongzükogo, koba October it ayongzükba agitsü sentong lir. Benjung mapang ano ODOP inyakyim aser district indang Banana vision document kübok inyakyim balala ayongzükba agitsü.

Senden ya iba benjung takok ngua amungtsü atema department balala aser stakeholder tem sendaktepa inyaksü asoshi sensaksemtü nükjidong nung ayongzükogo.

Wokha DC-isa iba senden nung, Administrative officers HQ Wokha, DFO Wokha, DPO Wokha, DAO & PD ATMA, Wokha, DHO Wokha, PD, DRDA Wokha, GM, DIC Wokha, Senior Scientist & Head, ICAR- KVK, Wokha, DDM, NABARD Wokha, DPRO Wokha, ARCS Wokha, aser ADPM, NSRLM, DMMU Wokha nung ajaki shilem agitsü metetdaksüogo.

Wokha District nung Slice Small Finance Bank branch tasen ka semzükogo

Dimapur, Luroi/August 31

(Agencies): Slice Small Finance Bank indang branch tasen ka Wokha District nung August 30 nü lapokogo, koba ajanga iba tesem temeket nung rongsenketzüng inyakyim atsülangtsü aser entrepreneurship ajungkettsü atema tongtibang jenjang ka agiba asütsü.

Iba branch lapokba sentong nung Advisor to the Chief Minister, Government of Nagaland, Dr. Chumben Murry tongti tejaoker liasü.

Sentong nung o jembiba mapang Dr. Murry-i, yimdak yimtsüng aser semi-urban tesemtem nung banking system tashi itshitsü aser financial literacy ajungkettsü koda tongtibang iba indang lemsatep. Paisa, Wokha District nung lanurtem peria aliba indang metetdaksüba den stakeholder tem dang lanurtem aser tetsürtem ajungkettsü atema rangloker inyaksü, aser parnok ya lokti liba aser rongsenketzüng temelenshi atema kanga tongtibang ta angatetsüla, ta ashi.

Murry-i, Slice Small Finance Bank ya "lighthouse of resources" ka, Wokha jila aser iba temeket nung aliba yimtsüngtem nung entrepreneurship aser shishlemba tilateri ajungkettsü asoshi lensayur ka akümtsü, ta ashi.

Sen aputsü aser financial service tem nüngdaker ta shia pai, iba amala facility tem yagi district rongsenketzüng tajungba kümdaktsütsü aser rongsenketzüng nung renloka aotsü atema shisatsü aser hadir tapet agüja lisopurtem nem tashi agütsütsü, ta ashi.

Kasa mapang nung tetushi tejaoker Wokha Deputy Commissioner, Vineet Kumar IAS-i, local rongsenketzüng nung tetsükdaktsü adokbatem kukteta aotsü atema bank

shilem indang jembiba liasü.

Paisa, Wokha rongsenketzüng tatentep mapang ka nung aliba indang lemsatepba den tetemlok agia sen aputsütepba inyakyim balala benoka inyaksangshiba tebilemtsü indang jembiba, koba ajanga nüburtem tetemlok tali agi kangshidaktsür, ta ashi. Maneni pai Slice Small Finance Bank amenokba ajanga financial service tajungba ka agütsütsü imlaba lemsatep.

Bank indang Liability Head of Slice Small Finance Bank, Guwahati Head Office Pranjal Medhi-i metetdaksü, shibai Nagaland nung tang agi branch trokbuba lapokba indang nükla aser nükjidongtem indang lemsatepba liasü. Bank ya shishilemba tilateri, entrepreneurship ajungkettsü aser maongka shitak mongui aliba loktitem atema parnok den apet banking solutions ka agütsütsü nükjidong nung lapokogo, ta paisa metetdaksü.

Sentong nungsa Lotha Hoho nungi lenir aser Team Metamorphosis, tir Dr. Thungdemo Kyong nungeria o tatsütsü jembiba liasü. Kyong-i bank ajanga local terenlok nung teyari agütsütsü imla ataba lemsatep. Sentong nung Slice Small Finance Bank, Meghalaya aser Nagaland Zonal Head, Seiboi Khongsai-i lokti pela agizükba o jembiba liasü.

Slice Small Finance Bank ya 2024 küm October ita fintech startup Slice aser North East Small Finance Bank na lokteper tentet, koba the Reserve Bank of India (RBI)-i agizükogo. Slice ya 2016 küm credit-focused fintech platform ka ama Rajan Bajaj-i ngutet, koba India nung lanurtem ajungkettsü nükjidong nung tenzükba liasü.

Slice Small Finance Bank yagi banking services, credit, aser payment solutions amala service tem agütsür.



August 31, 2025 nü Tianjin nung Shanghai Cooperation Organization (SCO) summit aliba mapang Ato kilonser Narendra Modi aser China Tir, Xi Jinping na leniba nung jurila senden ka amendang tangokba noksa nung angur.

District ajak nung Mini Secretariats amenoktsü: Delhi CM Rekha Gupta

New Delhi, August 31 (Agencies): Delhi nung BJP sorkari nüburtem nem yimsüsüba tajung agütsütsü atema inyaker, aser iba dak sendakba nung Delhi Municipal Corporation kübok zone 12 prongla den sütepa revenue districts ajak nung Mini Secretariats amenoktsü sentong lir, ta Delhi Chief Minister Rekha Gupta-i metetdaksü.

Laisa, district ajak nung mini secretariats amenokba ajanga nüburtem tebilemtsü onük tekeraba nung bentettsü, ta metetdaksü.

Chief Minister Rekha Gupta-i, revenue districts indang arrtsüji Delhi Municipal Corporation kübok zones 12 den sendakteptsü, aser ibaji taliba amalitepa inyaksü, administrative tsütsü ratamata malitsü mesüra arrtsü dak sendakba timtem malitsü aser mapang shidak nung nüburtem tebilemtsü onüktem bentettsü atema lir, ta metetdaksü.

Honibarnü Alipur nung tawa tasen asüba District Development Committee (DDC) Chairman office semzükba sentong nung lai iba osang ya metetdakja liasü.

Iba sentong nungji jembidang lai, yimjak nung tebilemtsü onüktem angadangba ajanga tekeraba nung timtem onüktem bentettsü, ta metetdaksüba den külemi Delhi yimti ano temerükba akümtsü atema sensotem nem shilem agidaksüner, ta mepishia metetdaksü.

Iba sentong nungji regional MP Yogender Chandoliya, Delhi Government Social Welfare Minister Ravinder Indraj Singh, District Development Committee Chairman Rajkumar Bhatia, MLA Ashok Goyal aser tongti ketdangsertem aika liasü.

Amit Shah anema jembiba atema Mahua Moitra anema FIR benok

New Delhi, August 31 (Agencies): Union Home Minister Amit Shah anema tashishitsü o jembiba atema Trinamool Congress (TMC) MP, Mahua Moitra anema First Information Report (FIR) ka benokogo.

Ozüng alema Bangladesh nungertem India telungi aitba menokdangtetba atema Shah tekolak tangzüksüla ta lai jembio, ta la nem tai tonglokja lir.

Moitra-i, Amit Shah-i özüng alema bendangertem aruba indang jembiba manener, ajisüaka arrtsülen anükba

security sepaitem ya Home Ministry kübok lir, ta ashi.

Chhattisgarh Chief Minister Vishnu Deo Sai-ia West Bengal Chief Minister, Mamata Banerjee dang Trinamool Congress MP Mahua Moitra anema inyaksüla, ta ashi.

Deo-isa, Moitra-i tashishitsü o jembiba atema West Bengal Chief Minister Mamata Banerjee-i tatok meshitsüla, ta takhangba agütsü.

"Trinamool Congress MP-i Union Home & Cooperation Minister, Amit Shah anema jembiba o ya tashishitsü aketba o ka dang masü saka özüng

alema inyakba ken o ka lir. Iba ama tashishitsü o jembitetba yabo Trinamool Congress tongti lenir aser Chief Minister Mamata Banerjee-i pusemba agi asütsüa akok. Mamata Banerjee-i lai Mahua Moitra-i jembiba oji pusemer asü pu masemerar metetdaksütsüla. Yamaji mesüra lai lar party nung lenir anema inyaksüla mesüra lai linük nüburtem dang tatok meshitsüla," ta pai ashi.

Homibarnü BJP lenir aser Lok Sabha MP, Ravi Shankar Prasad-ia TMC MP Mahua Moitra-i jembiba oji sashia aija liasü.



Mumbai, August 31, 2025: Maharashtra tesem balala nungi nisung aika Mumbai nung adenshia Manoj Jarange pusema Maratha reservation atema takhangba agütsürtem Chhatrapati Shivaji Maharaj Terminus (CSMT) nung mejanga aliba noksa nung angur.

Ramon Magsaysay Award atema India nungi Educate Girls shim

New Delhi, Luroi/August 31 (Agencies): India nungi tang mezüng melungtet telok Educate Girls-i 2025 Ramon Magsaysay Award angutsü.

2007 küm tentetba telok Educate Girls-i yimtsüing 30,000 nung tetsür million 2 dak tema school nung 'enrol' süja school-i yok aser tanur million 2.4 dak tema nem shisaliok agütsü.

Educate Girls tentetla, Safeena Husain-i, "Iba award atema Educate Girls shim ta parnoki sangdongba osang angashidang ni ajep. Ni tesüiba küm 18 bileteta liasü," ta ashi.

Husain-ia la lanuwa mapang shisaliok tsütsü timtem ajangshia liasü, aser ibaji ajanga lai iba mission tenzüksü apiteta liasü.

Lai, "Ni küm asem shi school züngtur anen, saka tetsür kati ni nungita yari, lai ni lar kidangi anir ao aser kü dang school-i tanaben aotsü ajungshia liasü. Ibaji ajanga kü taküm melenshi. Ozü kibong nungibo bendangleni oa London School of Economics nung azünger mezüngbubaji ni liasü. Ibaji ajanga iba ama maongka nung tetsür shinga mezüngdoktsü atema inyaksü ni apiteta liasü," ta metetdaksü.

Tanur asüidang tetsürtem ajak amai primary school-i aoer saka talisa West Bengal, Karnataka, Asaam, Gujarat

aser Madhya Pradesh ama state tem nung secondary stage nung tetsürtemi anenadoker.

Husain-i, Educate Girls-i talisa Rajasthan, Madhya Pradesh, Uttar Pradesh aser Bihar ama state nung kanga tezülen aliba yimtsüingtem nung rangloker inyaker, ta metetdaksü.

Laisa, "Tetsürtem school züngtur anenba tongti kuli anaji-sensak tia aser atsüapong ajanga lir. Sensak tia ajanga tetsürtem mapa inyakdaksütsüsa akümer. Iba denji külemi kibongtemi shisaliok agütsütsü atema chirnurtem rongnung shimdang tetsürtem züngdoker. Onoki inyakba mapa ya iba tangatetbaji melenshütsü atema lir, aser iba atemaji onoki Team Balika nungi volunteers ajanga inyaker," ta metetdaksü.

Husain-isa, tang iba award anguba ajanga ano iba wadang tajungba inyaktettsü, ta ashi.

"Tetsür shingaia kidang memongner, kera kibong mekümner mesüra kiset shiruru anepalu mesüner. Iba award anguba ajanga tetsür ajak school-i tanaben yoktsü atema inyakba maparen tashi itshitsü, ta ni amanger," ta lai metetdaksü.

Ramon Magsaysay Awards agütsüba sentong ya taküm November 7 nü Manila nung agitsü.



August 31, 2025 nü Punjab nung Gurdaspur district kübok Dhangai yimdak army temi kinü tanur ka (anogo 15 tanur) tzümetsüing nungi kümzükba sülen tangokba noksa nung angur.

Made-In-India drones ji US aser China-ia meputettsü: Rajnath Singh

Noida, August 31 (Agencies): Amongnü Defence Minister Rajnath Singh-i sentong ka nung jembidang Noida nung aliba Raphe mPhibr Pvt. Ltd nung inyakterem nem tenünsang agüja, nenoki India nunger defence sector nung tongtibang shilem agir, ta metetdaksü.

Iba sentong nungji jembidang pai, iba facility nung yangluba drones ya US mesüra China nunger systems-ia meputettsü, ta metetdaksü.

Rajnath Singh den Uttar Pradesh Chief Minister Yogi Adityanath nati Amongnü iba facility nungji defence equipment & drone

manufacturing unit semzüksüogo.

Defence Minister-i, "Atmanirbhar Bharat nung yangi aliba lanurtemi tongtibang shilem agir. India nung yangluba drones ji US mesüra China nung aliba systems-i meputettsü. Linük nung tasen apiteta inyakbaren temaba jenjangi tudar. 2017 küm iba plant tenzük dang nisung 10 dang liasü saka tangbo yangi scientists aser engineer 600 dak tali lir. Yangi mapa 5,000 dak tali adokdaksütsü," ta metetdaksü.

Rajnath Singh-isa iba facility nung India nunger Aero engine test bed tulutiba yangluba atema tenünsang agütsü.



TIR YIMYIM YIMOBILEM (EDITORIAL)

DIMAPUR MONDAY, SEPTEMBER (RONGJUI) 01, 2025

Longkak ait ataba agi timatemer

Nagaland nung state government kübok metokmeperi timtem aika lir saka government nung alirtem dang nungibo nübortem dak mekokmein aser tashimait tuluba aser teimba lir, iba jagi asen lima nungbo, tanga state nung ama masü, nübortemia gari lenmang majungba, light aser tzü junga magütsüba aser state government ajanga teyari tangutsü tim manguba asoshi ola madoker aser longkaka maiter. Kasaji, state government kübok department balala nung inyaktermia government-i tagütsütsü tim magütsüyonga ola madoker aser longkaka maiter. Iba jagi, talang nungibo Nagaland nung ya ajak shitak aser ajak junga lir amai bilema repranger saka tonga arua reprangra, yimti yimdong nungi tenzüka nübortem nem angati taneptsü agütsütsü yangluba mozü ki aser tanurtem nem kaketshisatsü angati angzükdaktsütsü asoshi lapoktsüba kaketrejutem ajak peisasa peia nümamedangtetsüsaba tia nung angutsü. Item tia ajakji tangar tesempar aser tsükchirtemi yanglutsüba masü saka asenoksasa asenoki yangluba tensa tiatem lir. Idakji yimya süpar, nübortemi government nung alirtem dang nungi kecha tajung meimlar aser government nung alirtemia nübortemi ola madok tashi government mozü kidang teyarir maliyonga odang toktsür aser kaketreju nung tesayur shitak maliyonga odang yutsür, iba jagi memeteti aser meteta anogo shia kümzüktettsüba ser nung mekümzüktet government mozü kidang nisung aika südagi ta bilemdi aser tajung akümtsüba ser nung mekümtet government school nung tanur tajung taküm aika raksatsüdagi ta bilemdi. Asenok asoshi kanga tia majung kaji, government school aser mozü ki tajungba kuma yanglur, sen meindoki aser talangkati moi taneptsü aser kaketshisatsü tajung angutsü asoshi School aser mozü kitem ajak nübortem nem peisasa anepaludaktsütsü asoshi “Communitization” sentong tenzüka saka government nung alirtemi anepaluba dang nungibo asenoksasa aseni anepaluba mozü ki aser schook-temang tamajungba aküm. Iba jagi asenok akoksar. Kasaji, government nung alirtemia government school aser mozü kitem junga moutetba timtemji pei tebilemtsü masü amato bilemer, ajisüaka tatem nungbo kodang nübortemi marentettsüsa timtem aser takoksa ajurudir, aginüang taginü, khureti government nung alirtem dangi arutsü. Ibaji temulungjang aser nükla nung yur, government nung alirtemi government mapa inyaktertem shimba, parnok nem mapa lemsütsüba, ketdangsüba aser ita sen aser teyari agütsüba maparentem shitak - shitak inyaka aotsüsa inyakyim shitak yur inyakra, iba jagi mapa inyakyim ajak nung ajak shitak inyaka aotsü aser government anema longkak aittsüsa mapa aser mapang agi mashitsü. Ajisüaka, tanübo lia-lia, meilongi-meilongi School Education department nung RMSA sentong ajanga shimba tesayurtemi ita sen dang masü saka parnok nem tagütsütsü temeten ajak agütsütsüla ta mapai mao longkak aita amonger aser ano külen, medical zünger mapa bushirtemi tang teinyakdak purtem tatidang magii mapa nung ‘regularise’ sütsütsü state government-i lemtetba anema longkak aiter ta state nung kanga tongtibang watang ana nung longkak aitba mapang ka ajurudagi. Atangji, RMSA tesayurtem aser medical zünger mapa bushirtemi longkak aita akangbaji makangtsüla ka akanger masü saka parnoki makangyonga inyaksür alitsüba mapa ka ser nung, mapang shitak nung mapa shitak-shitak inyaka maoba ajanga, government asoshia, longkak ait atar amaika kümogo. Aji oda, RMSA tesayur shimdang kechi telatetba jenjang ka nung shim, aji shitak inyaka olasang aser Covid tongpang nung nokdaktsü asoshi shimertem nema kechi inyaksütsü nangzüker shim, itemji jet ta memenu dang inyakadoker lilasang, government-a menüngdakba mapatem ajak ken o tasak kümer okadak senotsü aser mapang endoka nokdaktsüsa mekümla. Item ajak ya tanur majep tashibo tetsüi mama meyongdaktsüba ama, nübortemi ola madok tashibo government nung alirtemi pei sünütsü asüba aser nübortemi longkak mait tashibo tim teinyaktsü kata meinyaktsüi toktsüba ajanga atalokba timtemtem lir. Aji oda, timtem takoksa ajurur yaritepba dang nungibo timtem takoksa majurutsüsa nokdangba tajungba ta asüba tangatetba nung item yabo paidoktetsüla.

OLEMSABANG

LENNIR TAJUNG KAJI NÜBUR AJAKI AKÜMTSÜBUR

~ L. Kika Pongener.

Tsüngremi nisung shia nem sempet balala agütsü; aser sempet rongnung ajak dang tajungtibaji lenisuba (Leadership) sempet ya asütsü. Nisung aikati tanishir (Leader) asütsü kanga penbur. Nisung aikati yimden, arogo aser loktiliba balala nung lennir asütsü meranger. Ajisuaka, loktiliba balala nung tanishir ka asütsüba ya pei sasa aginua penbuba, mesura pei sasa merangdanga shik-kaba (Practise); mesura tangar jilo ajizüka benshiba (Imitate); iba amala merangdangba kisung agi dangbo makoktsü sudi, kechiyong tanishir ka asütsüba ya shisaliok jenjang (Degree) tulu ngua azüngba kisung agia makoktsü; kaket azüngba nungi anguba shisatsü (Knowledge) kisung agia makoktsü; saka Tsüngrem nungi anguba shisatsü (Wisdom) keta aliba agi dang akoktsü. Mapatong balala nung menden tajung (High Position) nung amenba/tenzüka kisung agia makoktsü, kechiyong lenisuba sempet yabo tsürabur nungi azü (Blood) nung senmangtepa aruba (Heredity) sempet rongnung ka lir. Anungji, nisungi merangba agi anguba masü; saka Tsüngremi balaka agütsüba sempet ka lir.

Ano nisung ajaki akümtsübuba (Respect) ya kanga aginur aser tangar nungia akümtsübu ya kanga yimlar. Ajisuaka, aseni asen sasa tangar nem akümtsübudaktsünuba agi tangari asenji akümtsübur masü, saka tangari asen akümtsübutsbaji asen jaklaliru yimya, asen jembishinu yimya, asen libaliru aser asen mapa dak tuluka keta lir. Aji oda, asen jakla yimya tajung, jembishinu yimya tajung, libaliru tajung aser aseni inyakba mapa tajung ngur tangari asenji akümtsübutsbü. Asenoki ajemalua tila kümer, tular-tilar, takar-sensaker aser nisung ajak den küsa lirumedema litetra, tangari asenji odang akümtsübutsbü. Nisung ka tangari akümtsübuba ya rongsen tulu akaba agi; takar asüba agi; mesura tular asüba agi; mesura Gari tajung (Luxury car) nung mener senzüba agi akümtsübur masü....Tilar aser sensaker ka danga suang....Saka pa/la jaklaliru yimya, jembishinu yimya, libaliru tajung aser tular-tilar ajak den küsa litetba agi dang tangari akümtsübutsbü. Ajak dang alia, shirnoki ajemalua tila akümer aser tangar danga akümtsübur parnokji, tular-tilar ajaki akümtsübutsbü.

Surabangla, shirnok dang lennir tajung ta ajatsü....??? Lennir tajung ta ajatsüba ya odangbo ajar masü, pa/la lenisuba nung nuburi temulong lemteter aser tamang kaateter asü makateter (?) Pa/la nem nungloktsüba mapa ajak nung pei ajangzüksüba nung rangloker inyaker asü (?) Mesura lokti ajungtsü atema pei nija takoksa arema inyaker (?) Ibaji kangasa tongtipang lir. Lennir tajung kati tangar dak tajung aliba reprangteter aser tajunger dangbo junger ta shiteter....Lennir tajung kati lokti nung mepetmesu alidang tetsüngdai yia yimjung yanglur. Lennir tajung kati lokti nung mepetmesu aser telemsa atoktsüsa ken o tamajung, tashiyim o aser tsükchitep o mejembir. Lennir tajung kati ngasangadema, mezümeküma aser asüküma ken o mejembir, saka yimli akaba o jembir. Lennir tajung kati tujukmerem aser mokokachi agi tangar atsüzüktsü memeranger. Lennir tajung kati pei atenba telok nung petsaperong, mepetmesu aser telemsa atokdaktsütsüsa ajungmeso masür, mesura sentong matonger; saka longjemtsü lenmang bushir aser wazüka kümzüka ayur. Lennir tajungi lokti ajungtsü asoshi nungsen metsübu tasü-ita ochi nung nokdaker aser ochi o lepdang agütsür.

Asen mimchir libaliru nung tsübuba ya tapu ana lir. Tsübuba kaji....Shidi, Molosongzü, Keyi, Pongzü aser Temenen Mojing tsübuba....Tanabubaji akümtsübuba (Respect) ya asütsü. Aji oda, tsübuba (Fear) nungji tesempa dena lir, saka akümtsübuba (Respect) nungjibo temeim dena lir. Shirnok jaklaliru, jembishinu, libaliru tajung, ajemalua tila kümteter; ajak den küsa liteter; aser mapa tajung inyaker....Parnokji tular-tilar ajaki akümtsübur. Nisung'er libaliru nung ajaki akümtsübusa taküm junga litetbaji ajak dang sempet tajungtiba lir. Anungji asenok ajaki asenji tangari tsübutsbüsa masü; saka akümtsübutsbüsa taküm junga alitsü kanga tongtipang. Lennir tajung ta ajatsüba ya odangbo majar, kechiyong nuburi temulong lemtettsüsa; tamang kaatettsüsa; ochishia mapa tajung inyakba; ajak den putepa litetba; iba amala lennir tajung kaji nubur ajaki akümtsübur.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Orphanage ka nungi puer aoba missionary den nisung 7 chiokogo



Missionary Gena Heraty

August 31, 2025: Haiti nung Orphanage ka nungi Irish nunger missionary ka den nisung tenet puer aoba sülen hopta asem shi lir chiokogo. Haiti yimtiba, Port-au-Prince nung Our Little Brothers & Sisters orphanage nungi missionary, Gena Heraty den nisung tenet August 3 nü puer oa liasü. Parnok rongnung arrshi küm asem tanur kata densema liasü. Lar kibongi sangdong ka

ajanga, "Onok melung kanga süngzükogo. Parnok kümzüka anir arutsü atema meranga inyakba atema onoki Haiti aser alima tesem balala nung alirtem dang pelaba lemsateper," ta metetdaksü. Ireland nung Deputy Ato kilonser, Simon Harris-ia social media ajanga, "August 3 nü puer aoba Gena den Haiti nunger ajak chiokba osang angazüka pelar. Parnok ajak junga lir ta angazüker," ta

metetdaksü. Paisa, "Atangji iba tatalokba ta Heraty'er kibong atema timtem tulu ajangshiba mapang ka liasü. Tesüiba hopta ishika parnoki kanga aremzüka Gena aser la den külemi puer aoertem pusema inyakba atema parnok nem tetushi agütsür," ta metetdaksü. Harris-i, "Heraty ya temeim aketba nisung ka aser tasütait nisung ka lir. Haiti nung timtemertem yaritsü atema lai la taküm bendanga agütsür," ta metetdaksü. Missionary Heraty ya Haiti nung tesüiba küm 32 lia arudar aser lai Kenscoff nung aliba orphanage nung tanur 270 shi yaria arudar. Tang Haiti nung ozüng alema inyakba telok balalai linük yimtiba tesem tulubaka amokbangba ajanga nüburtem kanga timtemer. Tensa kanga mejungi akümba ajanga ketdangsertemi raraba hadir bena aliba drones ang amshitsüsa akümer aser yimti tanaben agitsü atema bendangertem teyari agir. Osang angazükba agi, August 3 anepdang 3:30 ako meta prangpong amer telok kati Heraty den Haiti nunger tenet puer oa liasü.

Iran nung Khristan 53-i linük anema inyak ta tai tonglokja apu

August 31, 2025: Iran nung Khristan 53 apuba sülen Ministry of Intelligence-i Khristantem jagi linük anema inyaker aser security anema inyaker, ta tai tonglochtsü. Social media nung video ka prokshiogo, aser video nungji pua aliba Khristantem kar den ketdangsertemi apuba Laishiba densema Khristan kaketterem kar sayuogo. Khristan kaketteremji ozüng alema linük telungi bener ait, ta Khristantem nem tai tonglochtsü. Article 18 nung director Mansour Borji-i, "Tai tonglochtsüba ya tesempa agi jembiba tatishitsü lir. Parnoki nija nisungtem dang masü saka Iran nung Evangelical Khristan ajak anema inyaker," ta metetdaksü. "Evangelical Khristan ajakji Mossad (Israel Intelligence) den yaritepertem lir ta sayutsü meranger, ajisüaka state television nung tai tonglochtsübatemji court nungbo kuli magütsütet. Item ama ya meimchir temeden anema lir," ta Borji-isa metetdaksü. Taküm January ita nung Geneva, Switzerland nung Article18-i sentong ka ayongzüka agiogo aser iba sentong nungji United Nations

nungi ketdangsertemi, Iran nung Khristantemi linük security anema inyaer ta tai tonglokja apur. Iba dak alia baptiba, Khristmas benjung amonga mesüra telok sarasadem agiba atema-a temerenshi agütsür, ta metetdakja liasü. Taküm June ita nunga Islamic Republic of Iran anema osang tai proker, ta tai tonglokja Khristan pongu pua liasü. Laishiba ya ozüng ajanga nokdangba kaketa shia parnok aitsü. Taküm April ita nunga Khristan yimsü dangi meyiper ana ket nung Laishiba aika aliba agi tena küm 12 tepuokdak ayutsü obengdang agüja liasü, ta Article18-i metetdaksü. Iran Ministry of Intelligence-i sangdong ka ajanga, Israel den anogo 12 raraba sülen iba dak sendakba nung mita aoer, ta metetdaksü. Pua aliba Khristantemji US aser Israel nung aliba Arogotemi bendanglen training agütsürtem lir, aser parnoki Zionist Christian evangelical movement tenüng amshia inyaker, ta metetdaksü. Iran sorkari mapang talangka nungi Evangelical Khristantem aser Islam yimsü toktsür Khristan yimsü

agizükertem na bendanger. Iba dak alia Armenian aser Assyrian Khristan teloktema bendanga züngshir. Parnok pei oshi nung tekülem sentong agitsü melar saka Persian oshi nungbo tekülem agitsü memelar. Tang Iran nung Khristan 800,000 shibo Islam yimsü toktsür Khristan yimsü agizükertem lir. Borji-i, Iran nunger Khristantem aikati online resources dak metaloker mesüra bendanglen tamangba lokti senden nung adener, kechiyong kidang adenshia tekülem agiba nokdang, ta metetdaksü. Iran Ministry-i Khristantem nem linük security anema training agütsür, ta tai tonglochtsüba ya tesüngmangtsüka lir; iba ya Israel den raraba mapang nung parnoki tamakok anguba atema tai tonglochtsütsü merangba amai lir, ta pai ashi. Human rights lawyer, Hossein Ahmadiniaz-i ashiba agi, tai tonglokja alirtem nem Iran indang judiciary nung ochi obendang agütsütsü makok, aser parnok nem legal teyari magütsür. Khristan 11 tashi bail nung chiokogo saka tang tashi nisung 40 dak tema tepuokdak lir.

ANOGO ABEN TSÜNGREM DEN

Tangar ama tejashi

Saka, adianutem, teyimla makaba tangar pur ama, nenoki mang mayimtsü asoshi, onoki nenok nem amua aortem indang memeteti melidaktsüner.

1 Tesa. 4:13.

Khristantemi alimai jashiba ama mejashir. Alimai teyimla makai tejashiba ajurur. Khristan ka ama tejashi kar saka khristantem tejashi den teyimla kar. Yisu mapang nung asü pila sentepi maremzükteti jashiba tamaitsü sayuba liasü. Tasür dang akhümtsübu sayuba tamaitsü tashi agi arunga ajeb. Temeimer ka asüba atema jashiba nübui kechi atalok ibaji melenshitsü tashi mali asü? Asü pila nung meimchiri teyimla maka ta metetba dak alema tuluba ajangshiba mapang mali. Pa temba ka asü dang, Yisuia ajeb saka pa tejashiji teyimla makaba nungi adokba masü (Yn. 11:35). Lazar yakta shia arutsü ta Yisui metetta liasü. Ano Yisui pa tanaben arudang Lazar aser pa nütsüngtem ajak pa den kotak nung alitsü tasü nungi shia arutsü ta metetta liasü. Yisui ajeb kechiaser pai meimba pur mulungjang teyimla samaba pai angu. Pa tembartem shia aruba aser taküm parnok nung liasü, aji saka parnok jashia liasü (Yn. 11:25). Kodang Yisui tasü madak takok angu, Pai teti asoshi tasüba khristan tangatet melenshidaktsü. Tanga temeimer ka asü dang khristantemi tejashi ajuruba asenoki angur saka asenok teyimla kar kechiaser mashi tia nungi Tsüngremi tajung bener arutsütsü ta asenoki metet (Rom 8:28). Kechaia tasübaia asenok Tsüngrem temeim nungi piladaktsütsü makok ta asenok teyimla kar (Rom 8:38-39). Asenok teyimla ka kechiaser Yisu den teti tatem maka tepela telungjem Yisui bener arutsü aser iba telungjemji Kechaia menokdangtettsü ta asenok teyimla kar (Yn. 14:3). Na khristan ka süaka taküm tejashi nungi jenbua alitsü makok. Saka Khrista tasü nungi shia aruba teyimla nung nai ne tejashi sümentsü akok kechiaser Pa ne teyimla aser ne tesü nep lir.

ADF-i putirtem aser choir züngsem ama sayua nisung tepseter

August 31, 2025: Democratic Republic of the Congo nung Allied Democratic Forces (ADF) telungpurtemi tasa tasen ka amshia Arogo nung inyakertem ama sayua Beni Territory kübok Mayi Moya yim amakdang nisung asem tepset aser nisung ti puer ogo, ta International Christian Concern (ICC)-i metetdaksü. ADF telungpurtemi August 13 nü Ngite yimdak mezü ng iba mission tenzüka Tenla ki ka mita aoba mapang nung putirtem sübotsü aser choir sübotsü auya. Parnoki item sübotsüji sübor Arogo lenirtem aser choir züngsemtem ama sayua tanga yim ka amak, ta kasa osang ajanga metetdaksü. Arogo nung inyaker kati, "Parnok onok Tenla kidangi aruba sülen putirtem aser choir sübotsü auya. Iba sülen parnoki item sübotsü sübor Arogo ka nungi aruba telok ka ama sayu. Iba ya temenen sentong lir. Ozüng alema inyaksü atema tamangertem sübotsü amshiba ya tashioktsüba aser temenen mapa lir. Parnok dak tamang

akartem atema ni jashia bilemetsür," ta metetdaksü. Aonung 7:05 ako meta parnok Mayi Moya yim tonga aoba mapang nung yimdaklirtem jagi parnok pela agizük, kechiyong yimdaklirtemi parnokji tanga Arogo ka nungi arurtem ama bilema liasü, ta Arogo nung züngsem kati metetdaksü. "Ni-a parnokji tanga Arogo ka nungi aru ama bilem. Parnoki onok den pelaa jemb. Ajisüaka ni parnok süoshi telung nung prangpong bena aliba angu. Iba sülen ni jena ao," ta pai ashi. ADF züngsemtem jagi tebur asem khaset aser nisung 8 puer ogo, ta pai metetdaksü. Parnokisa dokan aser ki aika nungi auya aser nari dokan ka rongdokja liasü. Ngite yimdak aliba Arogo nung putir kati, "Parnoki onok meyong sübotsü ayatsü akok mesüra azü tokshitsütsü akok, ajisüaka parnoki onok tamang mauyatettsü. Onok taküm tanaben yangershitsü aser onoki maneni Tsüngrem külemtsü. Tasüba lenden nunga onok den Tsüngrem lir," ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Tetenzük**

(n) mezüing, tamasa (beginning)

* Tetenzük nung Tsüingrem liasü.

Tetenzük

(adv) teinyaktsü, teyari tagütsü (Don't serve)

* Lokti nung tetenzük ta aikati kü dang ashir.

**OLONG PAITEP # 7257**

1		2				3		4		5
				6						
	7		8							
9					10			11	12	
			13			14	15			
16					17			18		
				19		20				
21		22								23
24										

TIPLIN

1. Saku - (4)
6. Songjen - (7)
7. Mali/Tazüing - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüing kasa jatepba - (7)
25. Ki yangluba oset - (4)

LANGTSÜNGLEN

1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüingdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. -- tatsü - (3)
12. Tebur kidong aser zünga kasa tsüingda jatepba - (4)
14. Pela agizükba tapu ka - (5)
15. Tenüing atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 7256 TELANGZÜBA**TIPLIN :**

2. Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu, 15. Raksa,
16. Arameso,

LANGTSÜNGLEN :

1. Alimang, 2. Pongen, 3. Samaru,
4. Nün, 6. Pio, 9. Nüingdak,
10. Yongya, 11. Kongro, 13. Ora,
14. Ata.

NAI-A YA METETTER MA

Alima nung meimchirtemi jangja aliba script tejentibaji "Cuneiform" lir. Iba ya Sumerian nungeri 3,500-3,200 BCE tsüingda Mesopotamia (modern-day Iraq) nung mezüing amshia liasü. Iba züluba yimya yagi ajongli tapak nung ajena zülutsü asoshi 'reed stylus' ka amshi, koba mezüingbuba ongko inyaktsü atema amshi saka lia lia tongteprateptsü atema amshia liasü.

Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimym bureau tem nung agüjang.

Manipur police-i sen lakh 20 alang Myanmar cigarette apu**Imphal, Luroi/August 31**

(Agencies): Manipur Police-i Honibarnü sen lakh 20 alang Myanmar indang cigarettes puogo, ta ketdangsürtemi Deobarnü metetdaksü.

Manipur kübok Myanmar den arrtsü nung Tegnoupal district kübok Tegnoupal Checkpoint nung Honibarnü gari ka nung item cigarette tem ya benrer lia nguteta liasü.

Gari ya National Highway 102 nung Moreh nungi Imphal-i oya aliba mapang sota liasü. Gari nung bena aliba khu dak temulung melemi bilemba sülen police temi gari kanga junga lapoka bushidang aser

Myanmar indang cigarette carton 40 bener aliba nguteta liasü.

Gari ania alisang ya Kakching district kübok Sora Karanchi Mayai Leikai, Irengband nungi arishi küm 35 tain MD Sahid ta jangjaogo. Iba meita aoba sentong nung Assam Rifles team katia teyari agüja liasü.

Tegnoupal Police Station Officer-in-Charge-i ashiba agi, "cigarette tem ya kuli kaket tejangja mali bener oya liasü. Cigarette tem ya Myanmar nungi shibelener aruba ya bushisüingdang ajanga ngutetogo. Gari aser

gari anisa sota yua lir, aser temzüing ozüing kübok arrla tapet dak ajemdaker ken o ka benoktsü."

Paisa, "Police aser Assam Rifles na longjemer inyakba ajanga iba ozüing alema inyaksangshiba maparen ya sotetogo. Arrtsü adena shibelenba maparen balala nokdangtsü atema iba amala meita aoba sentong ya kanga tongtibang lir," ta ashi.

Police source kati ashiba agi, gari anisang dang ken o ashishidar aser iba shibelenba maparen nung sendaka alirtem jangjatsü atema maneni inyakdar.

PM Modi-i September ita Manipur semdangtsü akok**Guwahati, Luroi/August 31**

(Agencies): Sentong ajak ataloka ora Ato Kilonser Narendra Modi-i mepetmesü nung aliba Manipur state Spetember ita semdangtsü akok.

Bengali portal Ei Samay nung sangdong ka ajanga ashiba agi, Ato Kilonser yagi Churachandrapur semdangtsü imlar, koba Manipur nung azütokshi lendong balala atalokba teyongtsü lir.

PM Modi-i bendang lima balala sema senzüaka mepetmesü nung aliba iba North East state ya

mesemdangba atema Opposition party temi pa kanga aija arudar.

Pai September 12 nungi 14 tsüingda Assam aser Mizoram semdangtsü imlar. Modi-i Manipur tatamsa 2022 küm semdangogo. Pai Northeast nung state balala semdangba mapang Manipur-a semdangtsü imlar.

Manipur semdangba mapang Ato Kilonser-i, azütokshi lendong agi kongshir alirtem den ajurutepa parnok tebilemtsütem angadangtsü imlar.

Linük kübok tesem balala nung ken o balala adoker aliba

bentettsü atema merangba nung shilem ka ama PM-i item state tem semdangtsü lir. Anogo tonga aruba mapang osang tejangja metetdaksütsü ta kasa sangdong ajanga metetdaksü.

Manipur nung küm ana tejakdang kin o kin tsüingda mangatetep adokba sülen tang tashi yimjung bener maruteti timtemtepdar. Iba mepetmesü ajanga nisung aika pei talidak ki toktsür jenshiaogo aser aika taküm samaogo. Tensa tajungba küma azüoktsü asoshi state nung President Rule benoka lir.

Assam CM-i anogo ana atema Barak Valley semdangtsü**Guwahati, Luroi/August 31**

(Agencies): 2026 Assam Assembly elections matong tsüingda Assam Chief Minister Himanta Biswa Sarma-i Deobarnü nikongtsütsü nungi tenzüka Barak Valley semdangtsü.

BJP-i aniba NDA teloki 2025 küm May ita panchayat elections nung takok takok tajung anguba sülen tang pai iba tesem semdangtsü lir. Parnoki

Zila Parishad menden 397 nungi 300 koka liasü. Iba tesem nung alirtem nem party tali pusemdaktsütsü nükjidong nung pai iba tesem semdangar.

Sarma-i Udharbond nung 2:30 ako nung Kachakanti Temple semdang aser 3:15 nung Silchar nung Netaji Subhas Chandra Bose indang kerakyanglu ka sayaja liasü. Paisa, iba tesem semdangba mapang sentong balala nung

shilem agitsü.

Sarma-i September 1 nü Assam kübok Sribhumi district nung tzümetsüing agi kongshir alirtem nem teyari balala agütsütsü atema semdangba sülen pa Guwahati-i meyipa aotsü.

2021 Assam Assembly elections nung BJP-i menden 126 nungi 60 akok aser NDA den sorkar kümteta liasü.

Barak Valley nung menden 15 lir asünung iba tesem ya par party asoshi kanga tongtibang lir. Parnoki taruba küm election nungbo menden 95 akoktsü nükjidong yua lir.

CM-i iba tesem semdangba ajanga koba tashi tajangzük bener arutsütsü mejangja, saka Barak Valley-i telangzüba agütsüba ajanga Assam nung yimden yimsüsüba tarutsü yanglushitsü akok.

Israel-i Yemen nung Houthi ato kilonser tepsetba mang ayangtsü nangzük

Sanaa, Luroi/August 31 (Agencies): Hopta tetenzüklen Israel-i Yemen yimtiba Sanaa amakdang Houthi sorkar indang ato kilonser tepsetba sülen Yemen nung iba teloki tayang kepzüksü nangzük.

Ahmed al-Rahawi ya Brehostibarnü Sanaa amakdang danga minister kar den tepset, ta Houthis-i Honibarnü sangdong ka nung ashi.

Al-Rahawi ya linük sadanger iba teloki yimsü asüba nung ato kilonser inyaka liasü, aser workshop ka agidang Houthi-i aniba sorkar indang danga züngsemtem den külemi tenük yoka liasü, ta sangdong ajanga ashi.

Israel-i amakba nungya danga minister kwi tepsetar Houthis-i tejangja mashi.

"Onoki mang ayangtsü, aser onoki zübu taroktiba nungi takok angutsüsa inyaktsü," ta Supreme Political Council of the Houthis indang chairman inyaksang aser Yemen nunger yimsüsür aser military officer

Mahdi al-Mashat-i nikongdang sandong ka nung ashi.

Israel mitkari Sanaa nung "Houthi terrorist regime military target" ka nung amak ta ashi aser Israel-i Gaza amakba yong region nung maneni tensa mejungi aliba mapang ka ataloker.

Israel-i tawa Houthis positions nung aiben maka arur, kechiaser Yemen nunger telok yagi Israel nunga amaker aser Red Sea aser Gulf of Aden nung anüolen linüktem indang rong tem amak tenzük, koba Gaza nung Palestine nunger den dena lir ta sayur ta ashir.

Israel-i amakba ajanga par military operations nung tetsükdaktsü majurutsü, ta iba telok yagi aiben shia lir.

Israel south tsütsü missile ka khaloktsüba atema Houthis teloki Bodhbarnü tenüng agiogo, koba Israel-i raksatsü ta ashi.

Honibarnü sangdong nung, Israel-i amakba sülena par sorkar aser institutions temi pei mapa inyaktettsü, ta shia liasü.

"Ozü lenir tepsetba indang azü ya totzü akumtsü aser kasa lenmang nung maneni jajatsü asoshi ajungmesor asütsü," ta ashi.

Houthis-i maneni armed forces yanglutsü aser par tashi maneni renloktsü, ta al-Mashat-i ashi.

"Gaza nung aliba asen nübурtem dang ya ashir, asen tangatetba kasa lir, timtem komarka liaka tashiyim amshiba manen tashi kasa alitsü," ta pai ashi.

Sanaa nung tayimtsü amshia Brehostibarnü amakba nung nisung kwi asüar mejangja.

Israel media ajanga Hokulbarnü ashiba agi, Israel army-i ato kilonser aser danga minister 12 densema Houthi cabinet ajunga amak.

Israel-i August 24 nü Yemen yimtiba amakba nung nisung 10 tepseta aser 90 dak tema yirutsür anogo ana lir iba ya ataloker.

Iba mapang Israel mitkari Houthi military sites aser tir aliba ki amak ta shia liasü.

Israel-i Hamas odongtar Abu Obeida tepsetba jangjatsüogo

Jerusalem, Luroi/August 31 (Agencies): Deobarnü Israel indang Defence Minister Israel Katz-i sangdong ka nung, army temi Honibarnü Gaza nung tayimtsü amshia tesem ka amakba mapang Hamas indang armed wing odongtar Abu Obeida tepsetogo, ta ashi.

"Gaza nung Hamas kiralongrar indang odongtar Abu Ubaida tepsetogo aser molumi ponglang nung Iran, Gaza, Lebanon aser Yemen nungi axis indang züngsem tepseter alir ajunga ajurutsü yokogo," ta Katz-i X nung ashi.

Maneni Israeli security forces temi aibelen mesüi iba mapa inyakba asoshi tenüngsang agütsüba mapang, "Gaza nung campaign tesashiba akumba ajanga kobi melie pa indang criminal partners, Hamas nisung tepseter aser tashiyim agi shi nung medemer tem pa den

yangji adentsü," ta ashi.

Anüngdang Ato Kilonser Benjamin Netanyahu-ia Honibarnü Abu Obeida dak tenük yoker amak ta ashi saka pa asüba indangbo mashi.

"Onoki Hamas odongtar Abu Obeida alidak amak," ta Netanyahu-i sorkar senden ka nung ashi.

"Pa asenok den malitsü südi ta amanger, saka Hamas tsütsü nungi iba indang jangjatsütsü shinga mali," ta pai ashi.

Tang tashi Hamas nungi sangdong kecha agüja mali.

Abu Obeida ya Hamas indang military wing, Al-Qassam Brigades odongtar ama mapang talangka inyaka liasü. Teti pa video tem nung military fatigues aser keffiyeh temerem agi tejak nembanger liasü. Pa nungi tesüsa sangdong agütsüba ya Hokulbarnü liasü.

Indonesia longkak aitba anentsü mechi yimten yimsüsür teyari kar agentsü

Jakarta, Luroi/August 31 (Agencies): Indonesia tesem ajungalen longkak aitba anendaktsütsü mechi yimten yimsüsür nem sorkari teyari agütsüba kar agentsü political party temi mulungogo, ta linük tiri ashi.

Indonesia yimtiba Jakarta densema yimti aika nung taoba hopta sorkar anema longkak aita arur, kong aiben longkak aiter aser police tsüngta raratepa liasü.

Taxi driver ka asüba densema ken o balala ajanga iba longkak ya ait tenzük, saka tongtipangbaji ozüng yanglur nem monthly allowance tasen agütsüba liasü.

Allowances densema sorkari teyari agütsüba kar agentsü, ta Tir Prabowo Subianto-i Deobarnü sangdong.

Iba mepetmesü mechi Indonesia lenir ya China-i aotsü aliba athi, aser pai ashiba agi, longkak aiter kar yimjung nung tenzükba alakia oa sorkar atsüngdoktsü merangba aser kiralongra mapa inyakba lir.

Osettsüset auyar aser ki o jen raksatsür anema mera tesashi agitsü police aser armed forces nem totuyuba agütsüogo, ta pai ashi.

Deobarnü auyar temi tesem balala nung tenük yokba nung Indonesia indang finance minister Sri Mulyani Indrawati'er ki-a densema liasü, ta osang ajanga ashir.

Parliament züngsem indang allowances sen 50 million rupiah (\$3,030; £2,250) tali kumtsüba ajanga longkak ait tenzük, koba

Jakarta nung minimum wage dang ter ben agi tali lir.

Ajisüaka Brehostibarnü linük yimtiba nung longkak aitba mapang police gari kati arishi küm 21 tain taxi driver Affan Kurniawan menüngsetba sülen tesashiba longkak ait tenzük.

Hokulbar nikongdang regional parliament ki ka nung longkak aiter temi mi asenba sülen nisung asem tepset.

Hopta tatemlena maneni longkak ait, aser central Jakarta nung police temi yimdong nungi longkak aiter arishitsü atema tear gas khaloktsü aser longkak aiter kari police compound nung Molotov cocktails aser firecrackers mereplokja liasü.

Prabowo-i koba ozüng yanglurtem indang allowances agentsüar mashi, saka overseas trips nunga moratorium ka benoktsü ta ashi.

Ajisüaka ibaji ajanga longkak aitertem jashiba memesüzükteter.

Iba mera ya teperi masü aser ano maneni longkak aittsü asoshi jembitsü, ta linük nung kaketshir telok tulutiba, All Indonesian Students' Executives Body tekolakba Muzammil Ihsan-i ashi.

"Sorkari tera yanga aliba tebilemstütem bentettsüla. Yimdong nung ain adokba ya odangbo masü," ta pai ashi.

Longkak aiter temi taa tali, taxes tajemba, anti-corruption mera tesashiba meshir aser longkak aitertem dak police temi temerenshi tesashi agütsüba nung tai apuba lemsatepa liasü.

Tir Xi aser PM Modi nati arütsü ken o bentettsü nangzük



Tianjin, Luroi/August 31 (Agencies): Tianjin nung regiona summit ka tenzüktsü lia Deobarnü China Tir Xi Jinping aser India Ato Kilonser Narendra Modi nati arütsülen mangatettep aliba bentettsü aser tesendaktep akangshitsü nangzüktepogo.

2020 küm arütsü nung China aser India sepaitem raratepa linük ana tsüngta tensa mejungi akumba sülen Modi-i tang mezüngbuba China semdanger alitsü. China-i tenzükba region nung political, economic aser security telok, Shanghai Cooperation Organizatoon nung India züngsema aliba nung shilem ka ama Modi-i iba linük semdanger.

Xi den ajurutepba sülen, China den tesendaktep ya tetetzü akaba leni aor aser sepaitem ainshiba sülen arütsülen tensa tajungba lir, ta Modi-i ashi.

Paisa linük ana tesendaktep

maneni yangertsü asoshi arütsülen yimjung alitsü ya kanga tongtipang lir ta shia liasü.

Xi-ia Tianjin senden ajanga linük ana tesendaktep tali tajungba nung teti asoshi alitsü ano maneni jenjang ajungkettsü imlar ta shia liasü.

Arütsü mangatettep ajanga China-India tesendaktep meraksadaktsütsüla aser rongsenketzüng terenlok nung tali rangloktsüla, ta Xi-i ashi.

"Tsükchir masü apuani ama alitsü nükjidong meraksai inyakra, aser timtem masü terenlok maongka tem agütsüra, China-India tesendaktep tajungba akumtsü aser meilongi tejakleni aotsü," ta Xi-i ashi.

Russia Tir Vladimir Putin-a Deobarnü Tianjin tonga aruogo aser asüng-yanü lenir anaprong den ajuruteptsü lir.

August ita tetenzüklen China indang diplomat Wang Yi

New Delhi-i ao linük anaprongi jungshitepba sangdonga liasü. Sorkar anaprongi arütsü ken o jembishinü tenzükshitsü, visas agütsütsü aser linük ana tsüngta indang-indanga tayimtsü senzütsü nangzüktepa liasü.

India-i Russia nunger totzü aliba mechi US Tir Donald Trump-i India dang tariffs shilem 50 meshitsü telemtetba agiba mapang Wang-i India semdanga liasü, ajisüaka New Delhi-i Beijing den tesendaktep yanglushitsü atemabo ita aika nungi inyaka arur.

Taküm China aser India ketdangsür temi semdangba tali kuma shishilempaba nung tenokdangba agüja aliba ajemtsü atema jembi aser arütsü alema nübурtem senzüba indanga jembia liasü. June ita India nungi temeshi ainlen jajartem Tibet nung temeshi tesemtem semdangtsü Beijing-i mela liasü.

DDBA-i ayongzüka 3x3 basketball asayamung asaya



Dimapur, Luroi/August 31 (TYO): Dimapur District Basketball Association (DDBA)-i ayongzüka August 30 nü JV Basketball Court, Signal Angami nung anogo ka 3x3 Basketball asayamung ka ayongzüka asayaogo. Iba asayamung nung tebur team 24 aser tetsür team 5 ta ajak senteper team 29-i shilem agia liasü, ta DDBA General Secretary Yudang Ao-i sangdong ka ajanga metetdaksü.

Iba asayamung ya league-cum-knockout format nung asaya aser iba ajanga asayartem nem parnok sempet aser tasatem sayutsü atema maongka agütsüogo.

Tebur final asaya nung Highlanders-i 18-15 agi Orca team koka liasü. Orca nungi James-i kanga junga asaya-a pai point 9 tashi angu aser par team nem timla agüja liasü.

Asaya nung Kevin-ia point 4 bendenloksü.

Ajisüaka Highlanders' pur team ka ama kanga junga asaya aser parnok rongnungi Chumben-i point 4, Atsiezo-i 6 aser Sede-i point 5 ngua liasü. Asaya takoker ya parnok teamwork ajanga bendanga liasü.

Teburtem rongnungi Most Valuable Player ji Highlanders nungi Chumben liasü.

Kasa asayamung tetsür final asaya ABC (B)-i point 9-4 agi ABC (A) koka liasü. ABC (A) atema Asang aser Theja nati kanga meranga asaya saka ABC (B) nungi asayar Sungjemenla-i kanga junga asaya-a lar team takok dangi ani. Lai point 6 score asü. Asayamung akokba team nung Imtila aser Nisino nata densema liasü.

Tetsürtem rongnung Most Valuable Player ji ABC (B)

nungi Neiseno liasü.

DDBA-i, B-Level referees Salew Kadete aser Seyievizo Kire na den local ketdangsürtem dang parnok mapa tajung asoshi kanga pelaba lemsatepogo.

DDBA Working President Vitoto Chishio-i, "ni team, technical officials, aser asaya pusemertem shirnokisa iba asayamung takok asoshi teyari agütsüogo nenok ajak dang kanga pelar. Nenok tejangraba aser sportsmanship ajanga basketball asaya ya koda tongtibang aji lephsia metetdaksüogo- iba yagi telongjem adokdaksür, tepela bener arutsür aser asayartem aniteter. 3buba MS Ahluwalia Memorial 3x3 Open Tournament-a taruba itatem nung ayongzüka asayatsü aser iba den 3x3 aser 5x5 asayamung balala ayongzüka asayayonga aotsü," ta ashi.

Sub-Junior National Taekwondo C'ship nung NTA-i medal asem angu



Dimapur, Luroi/August 31 (TYO): Nagaland Taekwondo Association (NTA) nungi asayartemi 4buba Sub-Junior National Taekwondo Championship nung kanga junga asaya-a medal asem nguogo.

Iba asayamung ya August 28 nungi 30 tashi Jawaharlal Nehru Indoor Stadium, Cuttack, Odisha nung asaya liasü.

Team ya coach Visabiu Peseyie aser Santsuthung Ngullie na aser team manager T. Alem Aier nungeri anir ao, aser asayartem Sub-Junior

Boys Division kübok weight category trok nung asaya liasü. Nagaland nungi asayartemi gold medal ana aser silver medal ka ngua liasü.

Asayamung nung Shiusuthong-i 35 kg category nung gold medal angu. Pai Maharashtra, Haryana, Telangana aser Bihar (Final) nungi asayartem koka iba medal ngua liasü.

29 kg category nung Sudeh Lamliup-i Rajasthan, Sikkim, Tamil Nadu, Puducherry aser Uttarakhand (Final) nungi

asayartem koka gold medal nguogo.

Maneni Iciheing Nding-i 50 kg category nung silver medal angu. Pai Punjab aser Maharashtra nungi asayar akok saka final nung pai Uttar Pradesh nung asayar makok.

Asayar aser NTA ketdangsürtemi Director of the Department of Youth Resources and Sports, Kethosituo Sekhose aser NTA tir Pele Khezhe na dang parnok maneni nongita yariba aser ajungshiba atema kanga pelaba lemsatepa liasü.

US Open: Jannik aser Swiatek na round of 16 tongtetogo

Luroi/August 31, 2025 (Agencies): Defending champion Jannik Sinner-i Honibarnü Denis Shapovalov madak takok ngua pa indang title defend asütsü timla mesamai lir, aser kasa mapang nung Hong Kong nung Coleman Wong-i tamamangtsüka kanga junga asaya tuya aliba Andrey Rublev-i tsükdaksüogo.

World No. 1 Sinner-i, set ka mekoki aliba nungi meyipa tur 5-7, 6-4, 6-3, 6-3 agi Canada nung asayar ya koka liasü. Arishi küm 23 tain asayar ya 2008 küm Roger Federer sülen Flushing Meadows nung tebur kija asaya title defend süa otsü tasen ka yanglutsü meranga asayadar.

Top seed asayar ya round of 16 nung America nung Tommy Paul mesüra Kazakhstan nung Alexander Bublik den asayatsü.

Külem Italy nung asayar Lorenzo Musetti-ia 6-3, 6-2, 2-0 agi Flavio Cobolli koka tang mezüngbuba US Open nung Tasembuba set nung Cobolli yiruba ajanga asaya tembanga masayateti Musetti-i asaya akok.

Musetti taruba round nung Spain nung asayar Jaume

Munar den asayatsü aser kokyonga tur ano külem Italy nung asayar Sinner den asayatsü akok.

Maneni Honibarnü Swiss qualifier Leandro Riedi-i (ranked No. 435) otsü tasen ka yanglua pa 2002 küm sülen Grand Slam ka nung round pezübuba atongba lowest-ranked asayar kümogo. Poland nung asayar Kamil Majchrzak game ti dang asayaba sülen yiruba ajanga masayatetsüsa akümiba ajanga pai asaya akok.

Tebur kija asaya nungsa Hong Kong nung asayar Coleman Wong-i Russia nung asayar Andrey Rublev den set pongu kanga meranga asayar tamakok angu. Pa ya Hong Kong nung tebur asayartem rongnungi Open Era nung Grand Slam ka nung kija asaya ka akokba mezüngbuba asayar kümogo.

Iba asaya ya Rublev-i 2-6, 6-4, 6-3, 4-6, 6-3 agi koka liasü.

Kasa asayamung tetsür kija asaya nung World No. 2 Iga Swiatek-i kanga meranga asayarang Russia nung asayar Anna Kalinskaya koka round pezübuba tongtetogo.

Iba asaya ya Poland tsürla yagi ghonda ana dak tema asayaba sülen 7-6 (7/2), 6-4 agi koka liasü.

Neeraj-i anir India nung asayartem Wrold Championship asayatsü

Luroi/August 31, 2025 (TYO): World Athletics Championships 2025 nung asayatsü aliba India nung asayar 19 tenüng sangdongogo. India nung asayartem tetsür aser tebur asaya 21 nung shilem agitsü. Gulveer Singh (5000m aser 10,000m) aser Pooja (1500m aser 800m) na dang asaya anana nung asayatsü.

Team ya Olympic medalist Neeraj Chopra lenisüba nung asayatsü, shiba nem javelin asaya atema wild card agütsüogo. Athletics Federation of India (AFI) senior selection committee Brehostibarnü senden amen, saka asayar kar qualify asütsü masütsü mejangjaba ajanga asayartem mesangdongi liasü.

Javelin thrower Rohit Yadav aser race walker Sandeep Kumar nung amala asayartem qualify sür aliba asayartem dang nungi jenjang ka agi dang tekübokba nung liasü aser parnoka züngoksemogo.

Ajisüaka Asian Games nung gold medal ngur alisang 3000m



steeplechaser, Avinash Sable ACL surgery agiba sülen masayatetsüsa kümogo. Kasa mapang nung heptathlete Nandini Agasara shiba Asian champion ama iba asayamung atema qualify asü saka la-a tekatsüla yiruba ajanga masayatetsüsa kümogo.

Chopra ya defending champion asüba ajanga wildcard agütsüogo. Pa dak alaka Sable, Parul Chaudhary, Gulveer Singh, aser Praveen Chithravel nung ajaki automatic qualification mark ajantgetogo. Tetsür 100m hurdle asayar Jyothi Yarraji-iba asayamung nung asayatsü imla liasü saka la-a yiruba ajanga masayatetsüsa kümogo.

BILEMDANGANG

"Tesüiba kanga mejungi liaka
tenzükshitsü koka lir."